



2016-mut aningaasanut inatsisissatut siunnersuut.

(Aningaasaqarnermut Aatsitassanullu Naalakkersuisoq)

(Aappassaaneerneqarnera)

Ukiut tullianut aningaasanut inatsisissap suliarinera isumaqatigiinniutigineralu imaannaasimannqilaq. Ukiup siulliup ingerlanerani iluarsartuussinissat pitsanngorsaanissallu artornartuaannarput, kisianni pisariaqarluinnarpoq aallartinnissarput. Sivisunerusumik utaqqigutta - tamatsinnut akisunerussaap. Pingaaruteqarluinnaqqissaarpoq aningaasanut tunngatillugu pingaarnersiuiuinissarput sapinngissamik amerlanerpaat ikiorumallugit, qularnaarumallugu nunami maani ineriartortitsinissaq alliertortitsinissarlu. Inuusutissarsiutit nutaat pilersissinnaasaat aningaasat tamaasa atorfissaqartippagut. Taama pisariaqarpugu tungiuineq ullumikkut akeqarsorinngisarput kinguaariinnut tullernut akilertissanngikkutsigu.

Tamanna tunngavigalugu Naalakkersuisut Aningaasaqarnermullu Ataatsimiititaliami ilaasortaqaatikka qutsavigerusuppakka suleqatigiinneq pitsaasoq nassaarsiorfiusorlu pillugu uani suliami imaannaanngitsumi.

Ataguli aallarniutigalugu oqaatigilakka Aningaasanut Inatsisissatut siunnersuummi pissutsit assigiinngitsut Demokraatini iluarisimaakkagut piviusunnngortissinnaagatsigit.

Nuannaarutingaarput qularnaaratsigit Visit Greenlandimut aningaasaliissutissat, taamaasilluni Tunumut aningaasaliissutigineqarput 2 millioner koruunit takornariaqarnerup ineriartorteqqinnissaanut taamaasiluni Tunup takornariarfissatut periarfissat sulissutigineri nangingneqarsinnaanngorlugit. Tunumiut aamma nersortariaqarput eqqissillutik siumukarjuormata sorsuutigalugu nammineq sulinerikkut najukkaminni ineriartortitsinissaq sinaakkutissat aaqqiissutissallu pioreersut iluanni, tassani pissusitoqqat qimallugit eqqarsarlutit aamma pisortaqarfinni, takornariartitsisartut akornanni taamatullu aamma ataqaatigiilluarnerat pillugu naak suliaq imaannaanngitsorsuugaluatoq.

Demokraatini nuannarutiguarparput qinigaaffiup sinnerani akissarsianut akileraarut qaffattussaajunnaarmat taamaasilluni ineriartortitsinissaq aamma angerlarsimaffinni pisinnaanngorpoq.

Tusagassiutinut tapiissutinut eqqartorneqaqisunut tunngatillugu nuannaarutigaarput allakkanik nassiussinermut atatillugu tapiissutaasortoq eqquteqqissinnaasimagatsigu aamma qularnaaratsigu tusagassiutinut tapiissutinik qinnuteqaatinik suliarinninnermi susassaqqanngitsunik akuleruttoqartannginnissaa. Allakkanik nassiussinermi tapip qularnaassavaa nunamut tamarmik aviisinik nassiussuisoqartalernissaa.



Pisortat ingerlatsiviini pitsanngorsaanssamut piumasaqaatigut aamma iluatsippagut, nuannaarutigarpullu pisortat annikillisaavigineqalermata. Isertussanngilarput Demokraatini isumaqartuaratta pisortat ingerlatsinerat annertuallaartoq paasiuminaappallaartorlu taamaattumik akisussaaffinnik inissiinarneq ajornakusoortarpoq, qularnaatsumik eqaatsumillu allanngortiterinissaq aamma kukkunissaq qaninnerulersarmat aamma sullissinermilu kukkuluttornerit taamatullu ingerlatsineq paasiuminaalluni. Tamakku pissusitoqqat allanngortinniartussanngorpagut.

Sipaarutit ullumikkut qularnaarfaat inuiaqatigiinni ajornartorsiornerpaat illersorneqarnissat. Aamma siunissamik. Takujuminaakkaluarpoq qanoq iliorluta tamanna qularnaassaneripput, pisortat ikiorsiissutigisartagaasa assigiinngisitaalersinniarlugit suliaq imaannaanngitsaq aallartissanngikkaluarutsigu taamaattoqanngippammi pisariaqartitsinerpaat eqqorneqartussaammata.

Aamma kikkut tamarmik ilisimannguatsiarpaat meerarpassuit inuusuttorpassuillu pisussaaffipput naapertorlugu sulii ikiorsinnaanngikkigut, siusinaartumik pensionisialinnik peqartoq ullumimmut naleqqiullugu suliffinnut qaninnerulersitassanik aamma ullumimut naleqqiullugu kaffisoqatigiinnerni, ikinngutinik peqateqarnermi oqallitarnitsinnilu peqataatinniarneqartussanik. Peqqinnissaqarfik imaannaanngitsorsiorpoq, tamatta nalunngilarput nakorsamut sianeraangatta qanoq sivisutigisumik utaqqisariaqartarnerluta imaluunniit nakorsiarnarnitsinni. Atuarfeqarneq ikiorneqartariaqarpoq. Taamaakkaluartoq immitsinnut appisaluuttaqattaarpugut - kommunit, namminersorlutik oqartussat, angajoqqaat suleqatit aamma allat allaannglaq piffissaqaqalutalu akissaqaqisugut. Taamaattoqanngilaq.

Amerlasuut isumaqatigiissuteqartarnerat, suleqatigiinneq aamma ataqatigiinneq nunatta ilisarnaatigisariaqarparpai. Nuanniittaqaq akornatsinni iluanngittoqamat, kisianni unitsissanngilaatigut ataqatigiinnissatsinnut pisariaqarfiini. Tamannalu massakut pisariaqarpoq. Pakatsinartaqaq partiit ilaasa ataqatigiinnissaq nilliaatigileraangassuk peqataanik isumaqatigiissuteqarnissamut peqataaniataqaratik, pissutiginnarlugu siunnersuutit partiimit allameernerat taamaasillutik nunatta siunissaa pillugu aalajangiinissamut akisussaaffik oqimaatsoq qimarratigisarpaat.

Pakatsinartaqaq kikkut tamarmik oqaluleraangata sipaartariaqartugut eqqorneqassagunilli peqataajumajunnaartartunik. Kikkut tamarmik imminnuinnaq eqqarsaatigipput, pisorlu nammineq isumassarsiarinngikkaanni suna tamaat atorlugu nakkartinniarneqartarput naak aamma pisortat, meeqqat inuusuttullu inuunerat, meeqqallu atuarfiata sipaarfiginissaat pineqaraluaangataluunniit. Taamatut pissuseqarneq allanngortittariaqarpoq. Allatut ajornaqaq paasisariaqarparput pisortat aningaasaataannik atuingaangatta allat pinngitsoortariaqartartut. Aamma ajunngilaq. Tamatigulli immitsinnut ataasiakkaarluta aperisariaqarparput ajunnginnersoq.



Iluarsartuussinerit siunertaraat pisariaqartitsisut piffissami sivisuumi qularnaarunissaat. Utoqqalinersiaqalernissamat ukiut qaffannerata ilisiartornermut peqataanissamat akissat matussavaat, akeqanngitsunik angerlarsimaffimmi ikiorteqarnissaq, inuusuttut utoqqalinissaminnut katersinissaannut kaammattuineq, pisortat pisussaaffii oqilisarniarlugit pisariaqartitsisuinnarnut tutsitsisarnissaq anguniarlugu. Tamanna eqqarsaataavoq. Taama ajornanngitsigaluarpoq. Sunaluunniit anniaatigineqarluarpat.

Siusinaartumik pensionisiaqarnermut siunertaavoq, siusinaartumik pensionisiallit piginnaanngorsartarnissaat, oqittunik suliffeqartarnissaat, piffissaagallartillugu ikiorneqartarnissaat aamma imminiiginnarneqartannginissaat, nammineq akissarsiulerpata inuiaqatigiinnullu akuutinneqalerpata. Siusinaartumik pensionisartut ilaat ullumikkut namminneq akissarsiortareerput, taamaattumik malunnarpoq sulisinnaassuseqartoqareersoq. Asissuineruvoq oqassalluni inuit tamakku tamarluinnarmik sanngiitsuusut aamma akuttunngitsunik taamatut saqqummiunneqartarput. Inuupput assigiinngitsunik suliassallit, ilaat ikiorneqarsinnaapput aninguisullugit aamma ilaat aningaasaannarnik pisariaqartitsisuunngillat aamma pisariaqartippat paasineqarnissartik ikiorneqarnissartillu inuiaqatigiinnut akuulerusunnerminni. Ikiortariaqarpagut. Iluameertuuppat avatangiisusut taakkuupput siusinaarlutik pensionisialinnut akuersisussat sulilerpata, ilinnialerpatalu qularnaarlugu akisussaaqataalernissaat aamma ulluni naliginarni.

Ineqarnermut tapiissutit pillugit inatsisip siunertaraa, iluarsartuussinernut allanut ilapittuutaanissaq qularnaarlugu ilinniartut, suliffissaqanngitsut piitsullu ineqarnermut akiliutiminnut ikiorneqartarnissaat iluanaarniapiluit iniutillit inissaaleqisunik atornerlueqqunagit. Aamma qularnaarneqarpoq tapip naatsorsorneqarnerani maannakkorpiaq akissarsiat tunngiusarnissaat, tamannalu kikkut tamarmik soqutisarisariaqarpaat.

Aalisarnermik inuussutissarsiutilli 2016-mi akitsuusersuiffigineqartussaapput akitsuusersuinissamullu siunnersuutit siulliit annertuumik Sulisitsisut peqatigiiffiannit, KNAPK-mit SIK-milu akerlilerneqarput. Siutigut tarpartippagut akitsuutillu allanngortillugit. Aalisakkat tamatta pisuussutigaaqut aamma tunguinerimut tamakkiisumut ikorfartuutaasariaqarput, kisiannili aamma qularnaassavarput aalisarnermik inuussutissarsiortut unammillersinnaanerisa innarlinnginnissaat.

Peqataanik Demokraatini isumaqarpugut angutit arnallu inuusuttut inuutissarsiorsinnaanngorlugit ilinniartittariaqarigut, ilaatigut inuusuttut ilinniartillugit umiarsuarmi naalagassatut, qaamiutut, ilisimasortatut aamma allanut atorfinnut ilinniartillugit siunissat qularnaarumallugu.



Aamma neqinut akitsuut kiisalu ikummatissamut akitsuut peerpagut paarlattuanillu akitsuutinik eqqussilluta siunertaralugu peqqinnarnerusumik inuusoqalernissaa. Akitsuutit polikkerinngilarput, allatulli isumaqatigiissuteqartariaqarpugut sapiissuseqarluta inersimasutut, taamaattumik qummoroortartunut, sukuluunut, mamakujunntut il.il. akitsuutit allanngortillugit saqqummiussat iluarisimaarpagut.

Aap, nuanninngilaq tungiuineq tatisimaneqarmat. Taamaattumik ineriartortitsinissaq uummarissartariaqarparput, sulisinnaasunut isertitassat aamma Kalaallit Nunaanni tamarmi ilinniartitsinissaq ilungersuutigisariaqarparput.

Tamanna aqutissatuaavoq inuiaqatigiinnut iluaqusersuutigineqartartut qularnaassagaanni, taamaattumik suliffiit aamma eqqumiitsuliortut innuttaasulu iluanaarniapiluttututut isigiunnaartariaqarpagut aningaasarsiorusuppata. Aamma aningaasaliissuteqarusuttut iluaralugit ilassilluartariaqarpagut. Pisuusaarneruallaaqaat pisariaqartitsisunik ikiuisinnaasumik pisortaqarfeqarusuutigaluni akissarsiortunik asissuissagaanni aamma nunap unammillersinnaanera ullut tamaasa piuarpoq assigiimmik pinnikkusunneq piinnarlugu. Demokraatini isumaqarpugut assigiimmik pinninnissaq qularnaartariaqarippat assigiinngitsui atugaqartitsinissap qularnaarneratigut, sinaakutissat atukkatta iluanni.

Aningaasanik eqqarsarnersuarput peertariaqarpoq - arlaat iluatsitaarippat amerlanerusut iluaquserneqassapput. Sinngalluni eqqarsariaaseq mattuttariaqarparput, tamakkiisut eqqarsarnitsinni aallaavigisariaqarpagut aamma eqqaamiorput kinguariit tulliuttut aamma nunap ingerlalluarnissaat pillugit. Qinersisartugut sorliungaluarpataluunniit. Inatsisartunut ilaasortaaneq pisussaaffiliivoq. Taamaappoq. Sulisinnaasut suliumasullu amerlanerit takusinnaalerutsigit taava amerlanerit eqqarsalissapput saperatik piумallutillu.

Taamatut oqaaseqarluta siunnersuut Aningaasaqarnermut Akileraartarnermullu Ataatsimiititaliamut innersuupparput.